

張季子九錄

政聞錄

冊三

卷之九

七

政聞錄

卷五

政治類

勸和致江浙督軍電

民國八年己未

頃聞津保戰事未戢。影響南方。致江南縣鄉人民。輒有一日數驚之謠。聞自不肖黨徒。陰煽匪類。冀擾地方。以爲利。此輩性與人殊。自非正義忠言所能感動。惟念蘇浙本唇齒相依之地。友助與共之鄰。前者雙方誤會。既已解釋。伏願追維袍澤。共奠閭閻。勿聽青衣構惡之言。致釀蒼鵠出地之變。或請會銜出示。開諭兩省人民。俾商市農野。各安生業。不勝戴德。謹此電懇。另函陳。再致京電。乞鑒。

復齊省長電

民國八年己未

真通電敬悉。和議停頓。蘊毒猝發。蘇係東南七省安危。民國以來。全省雖幸粗安。省垣一再遭亂。至今未復。昨聞滬警。米貴方譁。金融復滯。商民何罪。被此摧

殘大電與秀督矢誠相見。共保治安。仁義之言。佩禱曷既。本無鬩牆之嫌。願副干城之祝。

主和通電

民國九年庚申

同胞相殺。戰禍綿延。商業凋零。生靈塗炭。凡有血氣。誰不渴望和平。加以邊境出兵。武力虛糜於內地。既失主觀之重。徒爲與國所輕。側聞朝野上下。無南無北。皆知亂不可怙。禍不可極。推原惡感。所循環。誠未見一方之獨是。揆度堅持之現狀。已馴至兩敗而俱傷。而實受其傷者在民。實受其敗者在國。南北當事。非有雅故。卽素知名。寧不知金注瓦注之重輕。分矢人函人之彼此。徒以各有可據之名。各懷先屈之恥。是以調停復調停。遲久又遲久。但託空言。終無事實。似此夜長多夢。河清無時。民有厭亂之心。而又絕最後之望。必至養噉噉以成熟。資眈眈以摧枯。苟至其時。恐不能容諸君操戈之競爭。并不能容諸公釋甲而修好。悔各無及。痛當如何。審聞爲公義而屈者。聖賢豪傑磊落之行爲。以怙惡爲能者。婦人女子覲覲之小見。事至今日。尙安有意氣可爭。智術可用。哀我

小民命懸於南北當局之手。地處局外。勢不能左右。取重其間。但野老之愚。惟知和平兩字爲聖神。亦願諸公掃除虛憍。一切之門面。與其忘遠慮而重近憂。不如推誠心而布公道。雙方明示悔覺。有如辛亥唐伍二公在滬會議前事。直接解決種種滯礙。不用往來傳述。庶和平真意發於雙方當事人。勝於無責任之調停。影響迷離。終無結果。寥村落支離。駸駸老矣。被髮纓冠。不忍同室之鬪。舉弓射戟。媿無解戰之能。敢掬血誠。爲民請命。幸共致力。以救顛危。不勝悚息待命之至。

主和致徐總統段督辦電

民國九年庚申

文日電不知獲達尊覽與否。津保之間。惡耗如故。山崩鐘應。蘇浙亦爲之不靜。推之人事。所謂兩系者。勢不兩存。必覆其一。而揆諸天道。不待一覆。必至兩傷也。謬事外閒人。無所左右於公等。老生常談。更不足辱志猛才豪者之一哂。顧公等充耳不聞。而下走視舌尚在。願以所覘之天道。竟言之。洪楊之亂。湘軍特起。繼湘軍者淮軍也。今所稱之北洋系。固淮軍耳。方湘軍成功。攀鱗附翼之人。

鋒起雲涌。大官高爵。冠冕全國。東南各行省子女玉帛之輸於湘人者。先後殆四十年。盛已。淮於其時沾丐已半矣。自國體變更。湘軍頓落。北洋系云者。遂蟬蛻於甲午戰後。而爲淮軍之代。顧不念未雪之恥。惟尋同類之仇。氣益憤張焉。其本原之本原。則唱湘軍者。當日猶知天道虧盈之懼。而唱淮軍者。但以高氣蓋世爲心。熟計八九年來。建種種之名號。襲種種之權術。以羅種種之金錢。過於湘人四十年之翕聚者。其倍何翅什伯。竊聞湘人此次所受之痛苦。過其已往所享之逸樂。前車不遠。湘則旣如此矣。盈速者虧亦速。盈甚者虧亦甚。人人求盈。事事求盈。則爭之本。爭而不已。則覆之本。覆卽假一系。卽在一時。誠天道也。天無他理。有固然。勢所必至而已。固老生之常談也。公等健者。奈何不務息民寧國。以順承天。而必反之。以趨乎施罔忒之天乎。審誠痛無辜人民。受無窮無方之酷毒。無可如何。而姑貢所見。以待轉瞬可覩之證驗。以稍澹後此繼爭者之慾望。以爲左右事平設施之地。或亦左右之所許也。津保之戰。如其可已。津保人民之福也。如不可已。乞諭蘇浙督軍。勿再被宵人交構。糜爛地方。俾全

國猶留此一隅不淨而淨之土使人稍減偕亡之感不猶愈乎特愛之愚幾疏之數伏惟矜諒再兩月以來米貴錢荒各處匪盜蠢蠢肆虐商市大擾蘇浙良民已不堪命謹更附聞

再致段督辦電

民國九年庚申

比文馬兩電不知果達覽否固不敢必公之垂聽也而近聞報載公意欲去某解某散某辭職不日披露之說亦不敢必確否而以謇夙昔所欽遲於公者推之則信爲不遠公之廉正磊落專一謇之所欽遲也因己之廉正而信人之不貪私因己之磊落而信人之不纖險因己之專一而信人之不反貳公之所蔽也蔽之所生之急於求好而不虛於兼聽顧蔽祇一時之虧而過亦君子所有以是信公必有不遠之復公亦知天道之不遠乎事久者勿論自南北分爭稍有識者卽知南與南之必歧北與北之必貳不寧惟此歧之中必又有歧貳之中必又有貳其準的則以其人夙昔有無以己預於所任事之權利爲斷今南果先歧北又繼貳不可說不可說將至於不可思議公豈能盡知之盡察之今



聞公言。公可明心迹於天下後世。公真君子也。小人之网君子。惟利是視。何所不用其極。願公大宏本體之仁明也。公誠仁明。百難解而國庶幾定矣。謗於前。清政府民國要人。苟有陳述。無不本其所見。盡言無隱。於公則尤敬惜焉。故聞此說。而不覺喜心之翻倒。爲公慶也。幸諒。

爲兵工事致徐總統曹張二使電

民國九年庚申

同室之爭。變爲齒舌。軋觸震擾全國。貽笑鄰邦。聞鈞座巡閱使調停之言。經略使灑泣誓師之言。知亦痛心久矣。昨聞湖北有繳械之兵。頃又聞曲師長旅部繳械降服直軍。此皆出入之證。未可以勝負爲言。惟念兵猶民也。民命固重。兵猶是命。寧當輕者。今繳械之兵。若不爲之所。一旦四散。無業資生。勢必流爲匪盜。延禍人民。寧非收械之軍。爲德不卒。往者謗忝任全國水利時。曾請政府以軍隊駐防鴨江沿岸。兼事林屯。以兵力溝通松遼。便利航路。嗣復因政府有裁兵之說。請以所裁之兵。分治導淮之役。嗟我當軸。握拳嚙齒。方事內訌。一切置之。兩三年來。荼毒湘蜀陝之民。命兵命不少矣。民本無辜。兵亦寧知何爲相鬪。



而捐此命。設一置想。歸獄何方。今津保之間。兵事殆將戢矣。此繳械之兵。及將來議裁之兵。若何安置。政府必應籌及。謬之愚。以爲北方之兵。宜安於北。安之事。無迫於工。工之宜。無重於松遼。松遼通而三省之交通利。曠土治。商業興。兵可還民。民可使富。地方百世之利。諸公無疆之休也。聞各國新銀行團之言曰。中國不論何方。相約不得更借款作戰。此誠人道之公言。今若以水利交通乏資。故揭誠與商。聲明借款不募兵。不購械。借款之前。先事測量繪圖。估工。款定分地。部勒編製。用時請其核數。監視發給。中國地方發展之利。卽各國商業貫輸之利也。殆無不可商者。諸公旣以調停爲心。或竟贊許茲說。北方如定。兵得所歸。推及各省。可爲矩矱。寧非諸公行仁布德。聲施無窮之事會乎。願圖利之於遼前測之圖。尙在北京水利局。熊君秉三處亦可詢導。淮圖策則呈報未久。政府可覆檢也。如荷採擇。乞酌度行之。是亦今日弭兵以後。標本兼顧之計也。伏祈諒鑒。

論時事復岑雲階函

民國九年庚申

頃奉大書敬悉南方諸公之真意。尊論分權法治二者。未革命以前。下走主張立憲時。持此說。既革命以後。則屢聞人爲此說。何意流極遷變。乃至不知所云。愈去愈遠。誰之咎也。事實未湮。禍源往復。今亦不暇推論。卽尊意亦有可繹者。法治是也。敢問此法治之法。孰定之。法生於道。道一而法殊。而背道非法。今所謂議法之人。何等人也。質言之。其來歷遠。不如豫備立憲時代之資政院所議之法。何法也。前後數次。糜費人民千萬金錢。擾害人民數萬生命。東抄一句。西套一篇。今日一條。明日一案。迄於不見一字。罪惡何如耶。此等人所議之法。孰尊之。孰信之。若新國會則一蟹不如一蟹。更不足道。分權是也。分權云者。應規定於憲法。憲法未見一字。權如何分。分如何有效。而訂憲法則須明國性。適國情。采各國成文。成一國特制。二者皆須生於國會。國會須生於選舉法。不先正選舉法。國會必不能有良好議員。國會不得良好議員。必不能有適宜之憲法。此可斷言者。選舉法如何。曰嚴資格。少名額。薄俸給。重懲罰。四者而已。選舉果正。議員皆賢。而後可矜式他人。維持國是矣。昔之雙方。皆務求伸而至於戰。今

之雙方皆不肯先屈而滯於和其實皆客氣也客氣者良心之障南之賢者號於人曰護法護法良心也其不肖者號於人亦曰護法護法客氣也敢問法指國會乎指議員乎國會者全國人之國會也何以全國人不盡願護則議員壞之也國會壞於議員則議員者國會之罪人矣南以護短爲護何如以不護短爲護若刻日明白宣布護國會非護不肖議員之意速忠告議員勿以立法之本分侵及行政之罪惡黨見既去學識乃來祛其舊染之污而充其天然之善限期修訂憲法草案改訂選舉法草案致歉於全國父老而宣布之宣布之後自請解散以誌夙過一面自議收束軍隊裁減安置軍人之辦法此南所以自勝之道也北之賢者號於人曰統一孰謂國不當統一者良心也其不肖者號於人亦曰統一孰謂統一之必濫用勢力者客氣也敢問國有二三之人可爲一乎人有角立之心可以統乎人不得則反求諸己民逆命則修德以來不此之務而召新國會以一邱之貉當陷我之矛過矣何如停止新國會俟南方憲法選舉法修訂宣布以後解散新國會但政界無補助買票之費而選法又已

根本改良。則國人自有素敦學行。不近權利。通達國情者。不以當議員爲恥。斯時正式成立國會。承認總統。選舉副總統。一面自議收束軍隊。裁減安置軍人之辦法。此北所以自勝之道也。惟此二者。商之議員。則與狐謀皮。商之軍團。則與兔謀脯。是賴雙方之當局。出其國民分子之天職。開誠心。布公道。而促成之。而後公所謂分權。所謂法治。乃有其基。乃有可言也。以世界大勢論。有必至於此之一日。第恐一門之內。不早自解。有爲解之門外人發言耳。是以支電不覺其過慮。將來歐洲大定。議和之日。我國得列席與否。誠至重大。此時似尙隔一層。不暇語此。拉雜奉陳。幸吾公教之。乞勿以示不知之人。橫生是非。千萬千萬。

反對龍軍移防電

民國九年庚申

比見報載龍濟光率軍屯墾江常之說。疑爲不類。昨見蘇督軍省長致京電。知確有此事。異哉。江常漲沙。何爲而須龍軍。龍軍何爲而須江常漲沙。屯墾府院諸公。誠煩誠苦。何乃並中國之歷史忘之。昔人屯田實邊。充國燉煌。鄧艾荀陂。今之內地。昔漢魏之邊圉也。江常地非邊。人不虛。謂欲墾。蘇尙有人。謂欲實。蘇

亦有軍不致勞龍軍之庇遠江常云者將謂北峽乎新漲之地領已盡矣尙難卽墾謂南峽乎尙未漲龍豈將問諸水濱況南峽關係江南北各縣利害極鉅正在測勘待決龍卽爲人用能以一掌障江乎中國宜屯墾地在東北在西北府院諸公或當有知之者龍果能爲充國鄧艾乎盍往一試否則自有蒙自地盍歸而芸諸且龍以軍來亦恐區區之地不足養也蘇人僉云不敢聞命伏願鈞座重加審慎毋自收無事之擾不勝迫切

招待美團復省議會函

民國九年庚申

連電敬悉此次美團視歷遠東吾國自應竭誠歡迎國民外交此爲嚆矢謬因體劣事冗路遙暑盛不克趨陪良用歉仄幸加鑒諒兒子亦因感暑事冗未能應召諸祈鑒原

致美團芮恩施君等電

民國九年庚申

中美邦交素睦敝國國體變更以來甚願共和先進之有所指導貴團惠臨遠東是以敝國人民一致謁誠歡迎亦深感巴黎和會貴國對於公理人道盡力

主持之厚誼。敝國目前政治。尙未趨軌道。雖更革國體。所必經之階級。共和人民所必償之代價。要亦地方自治力薄。自決氣散之故。有以致之。所望貴國議會。匡輔於前。貴國政府。維持於後。庶太平洋東西兩大共和國。得有左提右挈之效。兩國人民及全世界。亦必共增其福利。謇因路阻。憚遠年衰。畏暑不克趨寧。一一致敬愛於諸君。而敬慕諸君之誠。則不啻隨諸君後。與海潮俱上也。博士久別。渴念尤摯。極盼重臨。惠教無窮。敬此代晤。

辭赴太平洋會議高等顧問復外交部電

民國十年辛酉

佳電奉悉。天與我國生存進取之機。非一次矣。太平洋會議。又一我國生存之機會也。諸公盡籌碩畫。必有懲前毖後之遠謀。副國祚民命之重託。實深企祝。謇亦中國匹夫之一愛國之志。豈敢後人。重辱諉誣。寧不知奮顧。年力衰退。暑後羸病。加以災難橫罹。鄉里待救。未忍遠離。再四躊躇。不能應命。少謇一人。不足輕重。據誠謹辭。千萬融諒。顧公使少川。前次巴黎會議。及國際聯盟會議。均能得列邦及國民之信任。此會倘亦在列。勝謇十倍。量進慮戰。所望諸公。



再復外交部電

民國十年辛酉

刪電敬悉。元電方命。非有所矯飾。亦無所規避。特以事論。則國重而鄉輕。而以人論。則治里事。亦決不忘國。顧公使列入。良佳。謗有所得。必仍竭貢其芻議。若必以名義相迫。年衰力憊。期期不敢承。敬乞鑒恕。

復謝施省之電

民國十年辛酉

刪電敬悉。太平洋會議。前承部電。以高等顧問相屬。愛國之念。本未敢後人。祇以所職。運河局事。迫以洪水靈霖。災及裏運全部。險工懸睫。日難釋慮。鄉里復以風潮雨潦。災至五見。補救維艱。衰老之身。不足爲國事重輕。而里事則何可不顧而去。已於元日電辭。外部頃復電促。仍不敢承。遠勞介弟。廬注無任惶感。銘縷深之。乞爲致謝。

勸南北息爭通電

民國十年辛酉

旬日以來。湘鄂惡聲。繼續有聞。可惑滋甚。北方職幟之言曰。統一。南方職幟之言曰。自治。以民主國先例言。美國何嘗不自治。何嘗不統一。自治屬各省。統一



屬中央。屬各省者。就所宜分。以競進內政。屬中央者。審所宜合。以後盾外交。事理易明。絕非深奧。苟彼此坦然相見。以誠。各本良心。相資相諒。何事不可商權。卽有爭執。亦可訴諸全國輿論。聽其公評。非絕對須爲讎敵之事。而受軍閥政府之愚者。以軍閥自張。欲鞭笞暗叱。以令他方。而藉鞏權利。或且以自治爲不然而持聯省自治之說者。以聯省自衛。欲號召附和。以威異己。而自見殊奇。乃至以統一爲大戾。二者皆蔽。蔽各私所私。私故不明。不明則所相見者。徒以不誠爲市。甚至北視南爲寇讎。南斥北爲僞逆。而操縱播弄其間。以爲利者。朝縱暮橫。陽此陰彼。卽顛倒此統一自治之名。以爲舉足輕重之用。而戰禍乃延長。而民生乃無倖。最可異者。湘鄂被禍。創鉅痛深甚矣。趙司令湘人也。蔣司令鄂人也。旣以自治爲幟。則湘人有湘。鄂人有鄂。自治事不止製省憲百數十條文而已。實業教育水利交通。何止萬端。未遑舉一兵可已矣。曷爲而進。進乃召爭。無南無北。自大好勝之心同。不惜殘民以逞之習尙同。一若北必薄廣南必抵京而後快。不知南未必能卽抵京。北未必能卽薄廣。卽抵京卽薄廣。亦不足爲

武昔人砭官家之虐取於民者。謂如閉門而與子博。雖盡得其財。不爲富。今可爲喻。爲其爲兄弟之爭。無勝負之可伐也。今外患亟矣。太平洋會議。關係吾國目前四百兆人民之生命。將來數十世國運之隆汙。頃者顧專使迭次來電。謂美總統雖力主公道。我國內先須息爭。歸於一致。歐美各報。亦屢有此忠告。世界公論。我國之良師也。今姑如所云南北而爲之計。南曾下岳州走王。北又下岳州走蔣。幟自治幟統一者。言氣矜之隆。則氣各獲伸。言戰術之炫。則戰各有得。兵猶不可已乎。若果爲自治。曷不計若何而自治。當果爲統一。曷不計若何而統一。安勿用爲鬪狠之選鋒。勿借爲出場之面具。各抒所見。分寄各省各正當公共法團。若省議會。若教育會。商會。農會等。徵求真正民意。更由各省各法團公推有學識經驗明達政體之通才碩彥。公開大會以評判之。寧不能得正大和平之解決。謬之愚尤有一言奉勸。幟自治者。勿更樹異要求各國不可必得之承認。與要求不承認太平洋會議之代表。勿更弄飛機助戰增兵接厲之鋒。幟統一者。勿更護惜官吏憑藉名號。因緣爲姦利之窟宅。增人民之惡感。勿